

摘藻堂四庫全書薈要

集部

欽定四庫全書薈要卷一萬五千六百七

集部

誠齋集卷三十

宋 楊萬里 撰

詩

朝天續集

鄉林五十詠

鄉林

一代鄉林老吾生不並時來尋白玉柄祇見紫蘭枝

虎川

居士敬黃帽曾來照晚晴至今流瀼瀼猶學詠詩聲

歸來橋

已賡彭澤辭更擬輞川詩未老還山了猶嫌歸較遲

泛宅

猶道山中淺仍移水上居俗人又剝啄棹入白芙蓉

北垞

住處何曾遠林間別是涼清風酣一枕底許覓羲皇

退齋

爭進千岐捷辭榮一著難生龜教脫殼試作个般看

寓齋

宇宙一行店誰為店主人主人亦解去而况爨餘薪

叢桂

不是人間種移從月窟來廣寒香一點吹得滿山開

山齋

老子齋中宿同來無一人若非明月客誰伴白雲身

醉石

晚酌居然醉昏昏不自持
奇哉蒼玉枕眠到月來時

蘭畹

健碧續續葉斑斑
紅淺淺芳幽香空自秘
風宵秘幽香

駕月橋

紫霓入聲橫天度銀盤湧水來
先生騎霓脊盤上卷金杯

墨均

均中一池墨腕中百斛力
灑作五十詩千年照泉石

竹齋

凜凜冰霜節脩脩玉雪身便無文與可不有月傳神

三老亭

雙樹有古色一几非今樣祇言此老亡月夜聞屐響

通幽徑

點檢苔花暈微茫拄杖痕醺醺幾開落山雨濕黃昏

讀書堂

老以書為命眼將書作讎鄉林與誠叟同販短檠愁

碧蘆淥

春筍肥堪菜秋花暖可羶何須雙野鴨屏上五湖天

無熱軒

南北與東西溪光仍樹色人間無熱軒物外清涼國

陸龜

蒙詩云溪山自是清涼國

桑桑陌

繭館三眠老桑村獨樹春坐看黃更隕應有一寒人

柑子園

秋顚酣天酒春花喫國香
薌林親手種中有洞庭霜
放魚磯

為惜丹砂尾親投碧草潭
前頭有香餌千萬不須貪
白鶴亭

可憐林下鶴獨肯伴先生
猶有冲天志君聽叫月聲
幕翠庭

軟甃瑠璃地生揉翡翠幃
莫教星月入玉鏡照金徽
鵝篆灘

不博右軍字且留房相池新雛黃似酒把酒看羣嬉

南埭

音逮以土
場水曰埭

高謝三公府來畊五畝園園中有何好老子笑無言

過花橋

北埭通南埭前花映後花雨多橋板斷拆碎兩涯霞

桃李溪

白雪堆穠李紅藍染靚桃晨粧須蚤看莫待日華高

企疎堂

堂上清如水
薌林對兩疎
只今詩社裏
畫作企疎圖

梅坡

自惜花如雪
而今葉入雲
先生已仙去
誰與共天醇

薌林

酒名

梨花原

禁火曉未暖
踏青昏恰歸
何堪一原雪
將冷入春衣

海棠洞

艷翠春銷骨
妖紅醉入肌
花仙別無訣
一味服燕支

歲寒亭

冷笑元無味孤高別有心誰將桃李眼雪裏解相尋

菊坡

西風破幽馥東籬散清好淵明不可作解后鄉林老

文杏塢

道白非真白言紅不若紅請君紅白外別眼看天工

藥欄

日出花藥麗風生芝朮香枕中無肘後別有不傳方

玉井

誰言玉井春不作雙井味曾有眠雲客領略兩相似

芙蓉汴

音泮水厓也王維傳輞川有芙蓉汴

岼植木菡萏池栽水拒霜那知一家種同艷不同香

槐陰墀

音亦街陌道也

陰作官街綠花催舉子黃公家有三樹猶帶鳳池香

東臯

避世無功酒臨流元亮詩鶴鳴入天聽葉下報秋悲

聽水亭

泠泠無絃箏洶洶自鳴鼓最是醉夢中喚作松風雨

雪臺

玉樹參差出天花頃刻開先生倚欄處指點是瑤臺

西崦

坡壘端何似波濤起復低醉眠桂花雪不覺月華西

碧梧埧

往往游西崦時時憩午陰鳳來人不見飛入碧枝深

百花洲

茂苑猶香名南陽已荒草更蕪薌林中三洲是三島

有山堂

閣阜風烟外江西小有天茲山本無主掇入筆牀前

松湖

已訝松生市更將湖入城如何造物者百巧供先生

折蔬亭

蘆葍鼠尾大

音情

蔓菁兔耳長先生不忍摘野客却同嘗

瓜田

獨酌聖賢酒新嘗子母瓜丁寧林下友莫道故侯家

連輝觀

極目斜陽樹乘風落月梁更和山與水併作一秋光

瀆頭阻風

天寒春淺蟄未開船頭一聲出地雷老夫驚倒卷簾看
白浪飛從東海來東海復東幾萬里扶桑頃刻到長淮
瑠璃地上玉山起玉山自走非人推似聞海若怒川后

雨師風伯同抽差夜提橫水明光甲大呼一戰龜山頽
老夫送客理歸棹適逢奇觀亦壯哉豈不懷歸船不進
繫纜古柳依雲堆須臾驚定却成喜分付客愁金縷杯

至洪澤

今宵合過山陽驛泊船問來是洪澤都梁到此只一程
却費一宵兼兩日政緣夜來到瀆頭打頭風起浪不休
舟人相賀已入港不怕淮河更風浪老夫搖手且低聲
驚心猶恐淮神聽平聲急呼津吏催開閘津吏叉手不敢

卷三十一
荅早潮已落水入淮晚潮未來聞不開細問晚潮何時
來更待玉蟲綴金釵

過淮陰縣

索寞淮陰縣人家草草中荻籬緯春勝茅屋學船篷今
日非昨日南風轉北風霍然香霧散放出一輪紅

過磨盤得風掛帆

兩岸黃旗小隊兵新晴歸路馬蹄輕數番長笛橫腰鼓
一曲春風出塞聲鵲噪鷓啼俱喜色船輕風順更無程

却思兩日淮河浪心悸魂驚尚未平

望楚州新野城

已近山陽望漸寬湖光百里見千村人家四面皆臨水
柳樹雙垂便是門全盛向來元孔道雜畊今是一雄藩
金湯再葺真長策此外猶須子細論

阻風泊黃浦

回顧山陽北前瞻寶應東又逢翻手雨更着打頭風不
了行程債從來賦命窮客愁無訴處遙指畫船篷

過寶應縣新開閘湖

寒裏船門不可開
試開一望興悠哉
空濛烟雨微茫樹
都向湖光外面來

細雨初如弄隙塵
須臾化作舞空蚊
作團面旋還分散
只見輕烟與薄雲

雨絲拂水不曾沉
一一如珠一一明
亂走不停跳不住
忽然跳入水精瓶

漁家可是厭塵囂
結屋圓沙最盡梢
外面更栽楊柳樹

上頭無數鷺鷥巢

湖堤插柳早青蔥猶帶隋家舊土風
莫笑千株尺來許看渠攬盡夕陽紅

雨裏樓船即釣磯碧雲便是綠蓑衣
滄波萬頃平如鏡一隻鷗鷺貼水飛

半濃黛汁點遙林微淡鉛膏抹暮雲
似白如青都不是淮南弄色五湖春

天上雲烟壓水來湖中波浪打雲回
中間不是平林樹

水色天容拆不開

兩隻釣船相對行
釣車自轉不須縈
車停不轉船停處
特地縈車手不停

五湖佳處是荒寒
却為無山水更寬
歸去江南無此景
未須喫飯且來看

過九里亭

水渚纔容足
漁家便架椽
屋根些子地
簷外不勝天
岸岸皆垂柳
門門一釣船
五湖好風月
乞去聲與不論錢

過楊子橋

浪說春歸已四旬
淮南元自不知春
明朝却是中和節
野次誰憐寂寞人

客愁滿目政無聊
却報船經楊子橋
未到江南心已喜
隔江山色碧相招

瓜洲遇風

金鉦三聲船欲發
天地蒼茫忽開闔
惡風吹倒多景樓
怒濤打碎金山堦
濤頭拋船入半空
船從空中落水中

勢如崩山同日二十九聲如推墮萬石之簾千石鐘岸
人驚呼船欲沒舟人絕叫船復出平生所聞揚子江無
風已自波相撞莫教風動一波起三日奔騰收不止君
不見逆酋投鞭欲斷流藁街自送月氏頭

再賦石翁石婆

石翁誰怒猶睥目石婆多愁鬢先禿荒山野水四無人
二老對立今幾春珠襦玉匣化為土金鴈銀鳧亦飛去
知是六朝何帝陵摩挲碧蘚俱無語

觀張功父南湖海棠杖藜走筆

看盡都城種海棠只將一徑引教長約齋妙出春風手
人在中央花四傍

百株都好却嫌渠揀中東邊第一株開與未開相間着
濃紅密密淡踈踈

天工信手洒明霞若遣停勻未必佳却得數枝多葉底
慙慙襯出密邊花

送薛子才下第歸永嘉

河東鶯鶯志青天冀北麒麟受玉鞭二十年前元脫穎
五千人裏又遺賢諸君更草凌雲賦老我重看折桂仙
趁取春風雙鬢綠收科誰後復誰先

和張功父楨木巴攬花韻

南湖窠木已交加種攬栽楨更北涯生眼錯呼為夜合
鶯知不是碧桃花綠陰四合藏雲屋翠浪全機織素紗
佳隱主人臞見骨不餐酥酪却餐茶

楨木花似夜合
巴攬花似桃花

走筆謝張功父送白醪醑

西湖野僧誇藏冰半年化作真水精南湖詩人笑渠拙
不如儂家解藏雪藏冰窖子山之幽鑱透九地山鬼愁
儂家藏雪有妙手分明曬在翡翠樓向來吳二拉滕六
玉妃夜投玉川屋剪冰作花吹朔風揉雲為粉散寒空
醉揮兩袖拂銀漢捎頭萬斛冷不融瓊田紫月拾翠羽
砌成重樓天半許盤作青蛟吐綠雲亂飄六出熏沉炷
人間雪脆那可藏天上雪落何曾香三月盡頭四月首
南湖香雪今誰有分似誠齋老詩叟碎按玉花泛春酒

一飲一石更五斗

和祝汝玉作舉子語之句

玉奴何必減花奴
省識春風作畫圖
臨水隔花看走馬
翻身射雁落瑯弧
詞場君擅傾城色
詩社儂凋覓句鬚
摩壘致師仰餘勇
政慙連叔荅肩吾

和徐盈贈詩

不謁長安衆富兒
不隨舉子脫麻衣
片雲出岫元無事
催我詩成翻手歸

無鬼玄談彫若空
端能問字過揚雄
韓琮不生王駕死

乞

音氣

君明月與清風

送劉德脩殿院直閣將漕潼川

烏府何曾著佞臣
紫皇親擢得斯人
金丹半粒回元氣
玉宇崇朝作好春
不惜孤身輕一葉
坐令九鼎重千鈞
萬牛回首求梁棟
未要沱江理釣緡

半世西風吹盛名
晚同朝路慰平生
一言半語到金石
四海九州成弟兄
雪頰錦城君理棹
青鞋黃帽我歸耕

長江萬里通吳蜀
逢着雙魚各寄聲

送馬莊父游金陵

東華踏徧軟紅塵
却去秦淮釣月輪
朱雀烏衣王謝宅
黃旗紫蓋晉梁春
江山拾得風光好
杖屨歸來句子新
祇恐參卿署軍事
醲薰薦墨到槐宸

跋吳箕秀才詩卷

君家子華翰林老
解吟芳草夕陽愁
開紅落翠天為泣
覆手作春翻手秋
晚唐異味今誰嗜
耳孫下筆參差是

一徑芙蓉千萬枝，喚作春風二月時。
旁人笑渠眼花恐，落井渠方掉頭得。
句呼不醒老夫向來守荆溪，郡有詩人元不知。
贈我連城雜照乘，一夜空齋橫白蜺。
芙蓉春風之句

乃吳之警句也。唐吳融字子華云：不勞芳草色，更惹夕陽愁。

記丘宗卿語紹興府學前景

鏡湖泮宮轉街曲，纔隔清溪便無俗。
竹橋斜度透竹門，牆根一竿半竿竹。
恰思是間宜看梅，忽然一枝橫出來。
霜幹皴裂臂來大，只看寒花三兩箇。

和御製瓊林宴賜進士余復等詩

聖主臨軒士裒然曲江花底宴羣賢九天日月開清照
四海英豪看廣延祗合致君上堯舜不應侔德止宗宣
草萊憂國從今始記取雲章第一篇

送徐宋臣監丞補外

出處何心一似雲世間萬事不關身補天鍊石無虛日
憂國如家有幾人千載芬香只忠孝百年富貴竟埃塵
看君兩鬢青青在蚤晚歸來侍玉宸

題瀏陽縣柳仲明致政雲居山書院

雲居山高三萬尺下插瀏江上撞日
柳下和風百世師
有孫避地來築室奕葉隱居三百年
栽桃種柳今滿川
當家相傳一破硯此外文字九千卷
旄頭畢方書散亡
維仲明父再耿光木葉衣裳野蕨腸
牙籤玉軸還堆床
更於山下起高閣竹戶松窗照林壑
閣上諸郎夜誦聲
太一真人降雲鶴向來有子中文科
泮宮彈琴詠菁莪

子世南為
荆南教授
柳氏門閭人刮目
仲明依舊一漁蓑

小樓晚眺雲日

小樓挂上綠窻櫺
落日孤雲萬態生
碧玉峯巒白銀緣
峰巒暗處緣偏明

記丘宗卿燕冰語

醉燕冰丸不作難
不須碎嚼不須餐
聽渠歷歷胃中過
一寸詩腸一寸寒

送李制幹季允擢第歸蜀

名重仁甫之季子也其兄通判壁同登庚戌第

壁除將作監簿臺赴蜀任兄弟五人今存者三
人其長即賢良公堂

玉立長身太史公諸郎箇箇有家風高文大冊傳書種
怨句愁吟惱化工鴻雁雙銜月宮桂鵲獨戀蜀山桐
何如天網籠雲表三鳳都歸上苑中

林宏才秉義輓辭

其仲子嶠武舉狀
元今為閤門舍人

行盡江南北於何隱去休福清好雲谷老子得菟裘風
彩今千古英靈閔一丘庭堦俱玉樹仲氏立鰲頭

題沈子壽旁觀錄

逢着詩人沈竹齋
丁寧有口不須開
被渠譜入旁觀錄
四馬如何挽得回

送吳敏叔待制侍郎

脚踏鷄翹豹尾間
心飛碧岫白雲端
人看疏傳如圖畫
帝念嚴光返釣灘
玉殿松班唐次對
竹宮茅立漢祠官
自憐病鶴樊籠底
莫羨冥鴻片影寒

寄吳宜之

晝畫溪頭老詩伯夜傍仙槎鬱林石要令南斗避文星
却歸北辰捧天極頃逢桂江雙鯉魚慙慙兩寄尺素書
山長水遠到不到未必韋郎跡也踈書中只有相思字
更及融州一寒士泮水曾參冷似冰等待春風放桃李

和沈子壽還朝天集之韻

愁城不着狂詩客徑超天外華胥國苦海惟愁熱惱人
別有月中水精域浣花一老已九京何人再築五言城
竹齋衣鉢傳錦里咄咄雲煙飛落紙胸中磊塊有餘地

語下飄蕭無俗氣詩壇筆陣制中權勢如常山看率然
觀者堵牆顏色沮驚聞拓彈落金盤老夫性癖耽此趣
被渠夜半赤手取重陽過了元不知猶有黃花三兩枝
雨中出湖上送客

細雨輕烟着地昏湖波真箇解生塵淨慈靈隱君休覓
失却諸峯不惱人

入北昭慶寺

兩岸芙蓉雨洗粧愁將紅淚照銀塘擡頭不起珠璣重

柳外西風特地狂

張幾仲侍郎輓詞

半世金閨彥中年碧落班一般俱紫橐千古忽秋山青
入篇章裏春生岳牧間汾陽舊部曲白髮萬人潛

烈考同心德中興異姓王勲勞貫三極文獻在諸郎公
也山林味天乎日月忙一生非不達晚達却堪傷

京口連滄觀洪都孺子亭飛觴回落月灑筆濕寒星別
去長離索歸來遽杳冥知公喜儂句五字酹英靈

徐氏太淑人輓辭

大理卿王
李德母

三子官期至同時各致勤爭迎阿潘母獨就大馮君喜
入烏巢舍驚傳鶴弔墳傷心是廷尉目斷太行雲

跋眉山程仁萬言書草

我眉山下三蘇鄉至今草木文章香近時英妙有程郎
數寸管底翻錦江向來曾草三千牘流涕太息仍痛哭
九虎當關北斗深十年買桂炊白玉荆溪溪上相識初
君猶少年我壯夫帝城再見各白鬚袖中一紙梁溪書

剡藤方策一萬字猶帶權書衡論味君不見古來富貴
埽無痕只有文章照天地

題鞏仲至脩辭齋

人道莊周夢蝴蝶我言蝴蝶夢莊周莊周解飛蝶解語
說向蝴蝶應點頭脩辭齋中子鞏子年少詩狂狂到底
蹇驢破帽衝達官白眼清談對餘子束菜一翁即斯人
世人皆憎翁不嗔為渠落筆三大字政自不妨詩入神

秋夕不寐

每到炎天只願秋如何秋到却成愁官居也有寒蛩語
不似山間聽得幽

夏熱通宵睡不成秋涼老眼又偏醒窻虛月白清無夢
却為西風數漏聲

跋符發所錄上蔡語

洙泗淵源一線寒再從伊洛起濤瀾偶看上蔡先生語
滿目淙淙八節難

符君天秀擢炎方繭足擔簦學北方不是澹菴謫南海

姓名那得許芬香

贈墨工張公明

廬陵舊墨說潘衡廬陵新墨說張生
潘家衣鉢嗣蘇子張家苗裔出易水
易水松花烟一螺漲起倒流三峽波
人言天下無白黑那知真有玄尚白
磨光漆几奪眼睛試點一點傾人城

跋丘宗卿侍郎見贈使北詩一軸

太行界天三千里清晨眺入寒窓底
黃河動地萬壑雷

却與太行相趲來青崖顛狂白波怒老夫驚倒立不住
乃是丘遲出塞歸贈我大軸出塞詩手持漢節妮秋月
弓挂天山鳴積雪過故東京到北京淚滴禾黍枯不生
誓取仇頭為飲器盡與黎民蘇顛顛詩中哀怨訴阿誰
河水嗚咽山風悲中原萬象聽驅使總隨詩句歸行李
君不見晉人王右軍龍跳虎卧筆有神何曾哦得一句
子自哦自寫傳世人君不見唐人杜子美萬草千花句
何綺抵以詩傳字不傳却羨別人雲落紙莫道丘遲一

軸詩此詩此字絕世奇再三莫遣鬼神知鬼神知了偷却伊

謝湖州太守王成之給事送百花春糟蟹

烏衣巷裏批勅手整頓乾坤渠儘有天風吹入水精宮
一夜陽和徧花柳愛殺茗溪波底雲揉雲釀出蒲萄春
更授百花作香塵小槽濺破真珠痕一杯吸盡太湖月
郡齋忽念山中客遠澆白首草玄人伯雅仲雅俱清絕
一介不肯遣長鬚却遣郭索持尺書二執戈者爭走趨

登彼糟丘勸腹腴可憐郭索與陸諶不傍貴人熱門戶
却訪誠齋老病翁多謝茗溪賢地主

贈寫真水鑑處士王溫叔

我不如森森千丈松我不如濯濯春月柳髯疎髻秃已
雪霜皮皺肉皺真老醜葉生畫時顏尚朱王生畫時骨
更臞一生愛山吟不就兩肩化作秋山瘦君不見襄公
鄂公圖凌煙腰間羽箭大如掾君不見浣花醉圖粉墨
落日斜泥滑驢失脚貴人寒士兩相嗤畫圖猶在人已

非王生王生且停手不如生前一杯酒

題汪季路太丞魏野草堂圖

汾陰西祀告昇平四海無波鏡樣清

去聲

與幽人好風

月萬山裏許聽泉聲

奉常夫子半錢無不問田園況室廬聞道買來新宅子
借看却是草堂圖

題汪季路所藏李伯時飛騎斫鬃射楊枝及
繡毬圖

虎夫馳射殿西偏一箭穿毬不再彎飛騎新圖天上本
龍眠偷得到人間

君王將幸寶津園刷洗天駒尚未乾禁地何緣有闌入
考官應奉得來看

曉登小樓霧失南高峰

日日南高峰知我登小樓笑回紫翠面擎獻新鮮秋獨
將詩魂去恣繞月脇游得句寄與渠月姊不敢搜絕頂
珥瓊筆仰空書銀鈎今晨招不來開窻得孤愁折簡呼

屏翳能為追亡不

跋羅春所藏高氏樂毅論

右軍樂毅論大令洛神賦王家小楷天取將祇餘驚鸞
尚雙翥昭陵銀海閱銀鈎秦王卧看偷兒偷秣陵井苔
剝山骨祝融復遣山鬼搜裂瓊劃玉各分散遺下寶圭
三五段墨卿收拾驪頷珠堇堇一百八十餘江西今代
韓吏部古心古道生好古雷電勃興急提取阿那精靈
會飛去

國初高紳學士得此石秣陵井中後其子孫以石質錢於錢氏錢氏家火石碎尚有五六段有

字一百
八十九

贈周敬伯

鄉里親鄰周敬伯補入太學散遣僮僕歲晚不
歸伊唔丙夜嘉其有志贈以長句

萬方英傑集橋門作麼吾州不數人之子獨攜一方策
短檠以外四無鄰歲云暮矣猶為客歸去來兮未立身
待上六鰲頭上立還家藉手拜雙親

贈剪字吳道人

翦李義山經年別遠公詩用青紙翦字作米元章字體逼真

寶晉雲烟雜海濤玉谿花月寫風騷一生不倩毛錐子只倩并州快剪刀

題汪聖錫墳菴真如軒在玉山常山之間


東吳南垂楚北際中央不合大如礪百灘千嶂自一川
清空不是人間世玉山先生攜老禪把茅結菴開小軒
身前身後來醉眠一醉不醒三千年先生杖屨半宇宙

每到此軒去還又為憐雪立孤竹君月骨風筋如許瘦
向來種笋今排天先生手痕故依然騎龍帝旁為飛仙
玉館寂寞空寒烟

誠齋集卷三十

謹案卷二十九第三頁後四行上頭更着野人家
原本更訛便據宋詩鈔改

卷三十第十六頁後五行醉嚙冰丸不作難原本
丸訛瓦據別本改



總校官庶吉士臣張能照

校對官庶吉士臣陳墉

謄錄監生臣朱娘

欽定四庫全書薈要

集部

誠齋集卷三十一至三

詳校官助教臣謝登雋



欽定四庫全書薈要卷一萬五千六百八

集部

誠齋集卷三十一

宋 楊萬里 撰

江東集

和陸務觀用張季長吏部韻寄季長兼簡老

夫補外之行

今代老龜蒙無書遺子公也能將好句特地寄西風遲

暮甘三已飄零笑兩窮絕憐張與陸百戰角新功
別去公懷我詩來我夢公半輪笠澤月一信鏡湖風豈
有詩名世而無鬼作窮管城言曉事猶欲策元功

之官江左舟中梳頭

耐痒呼僮理亂絲一梳一快勝千篦是中妙處無人會
合眼垂頭到睡時

題張以道上舍寒綠軒

菊芽伏土糝青粟杞笋傍根埋紫玉雷聲一夜雨一朝

森然迸出如蕨苗先生饑腸詩作梗小摘珍芳汲水井
風爐蟹眼候松聲眾羅親撈微帶生爛炊凋胡浙青精
芼以天隨寒綠萌飢時作齏仍作羹飽後龍鳳空庖烹
大官蒸羔壓花片宰夫腍踏削瓊軟豹胎熬出禍胎來
貴人有眼何曾見天隨尚自有愁魔愁杞作棘菊作莎
君不見黃金錢照紅玉豆秋高更覺風味多先生釀金
鍊紅玉自莎自棘如子何金空玉盡苗復出喫苗喫花
并喫實天隨白眼屠沽兒不到有人頭上立

宿長安閘

野次何消追水程
昏時即住曉時行
驚眠幸自無更點
猶有船頭擊柝聲

讀詩

船中活計只詩編
讀了唐詩讀半山
不是老夫朝不食
半山絕句當朝餐

夜泊平望

夜來微雪曉還晴
平望維舟嫩月生
道是燭花總無恨

為誰須暗為誰明

一色河邊賣酒家於中酒客一家多青帘不飲能樣醉
弄殺霜風舞殺他

平望夜景

三簌簌三當當夜泊平望更點長新月無光湖有光昨
宵一雪今宵霜犬吠兩岸歸人忙夜深人靜無一事畫
燭泣殘人欲睡忽有漁船外水來一棹波聲風雨至半
生墮在紅塵中浮家東吳東復東樓船夜宿瑠璃國誰

言別有水晶宮

遠樹

行行遠樹慘無聊
脫盡清陰只有梢
霜幹瘦來無可庇
更能庇得鷺鷥巢

望姑蘇

曠野平中天四垂
凍雲隙裏日平西
水邨人遠看來近
茅屋簷長反作低
最愛河堤能底巧
截他山脚不勝齊
喜聞借得姑蘇館
百尺高臺入杖藜

風定過垂虹亭

松江來過不勝愁過了垂虹百不憂忽見石湖山上塢
定知塢背是蘇州

鱸魚

兩年三度過垂虹無過垂虹每過中要與鱸魚償舊債
不應張翰獨秋風買來一尾那嫌少尚有杯羹慰老窮
祇是蓴絲無覓處仰天大笑笑天公

泊姑蘇城外大雪

夜燒銀燭卷金卮
猛落天花醉未知
若怯一寒都不看
却教六出更誰施
開窻片片洒人面
送眼山山呈玉肌
纔雪又晴晴又雪
吳中風物許清奇

今日雪光滿碧空也
無霧雨也無風
寂然窻戶黃昏後
霍地瓊瑤一望中
千里湖山銀作地
半篙舴艋玉為宮
丁寧浮蟻非常綠
計會祥磨分外紅

跋袁起岩所藏蘭亭帖

南湖千載有斯人
拈出蘭亭花草青
俛仰之間已陳跡

至今此紙尚如新

謁范參政并赴袁起岩郡會坐中熾炭周圍
遂中火毒得疾垂死乃悟貴人多病皆養之
太過耳

後炭前鑪便是窑饒君似鐵也教銷不須泉下火山獄
新制人間法外條今日晴明殊可喜病夫意緒自無聊
看來只欠刀圭藥脚踏層冰雪沒腰

辛亥元日送張德茂自建康移帥江陵

極知借寇未多時道是徵黃有近期不割半青江令宅
却飛大白習家池湖山解語云來暮淮水無情也去思
莫近鄉關動歸興輕黃一點上雙眉

西湖一別忽三年白首相從豈偶然到得我來恰君去
正當臘後與春前醉餘犯雪追征帽送了憑欄望去船
待把衣冠挂神武看渠勲業上凌烟

金陵官舍後圃散策

江梅未落杏花繁萱草都齊柳半勻却是淺寒花較耐

東風未要十分溫

旋種花窠二百枝不知種了有花無阿誰便向春工說
急擣紅藍染玉酥

過秦淮

曉過新橋啟轎窗要看春水弄春光東風作意驚詩眼
攪亂垂楊兩岸黃

後圃杏花

小樹手初種當

去聲

年花便稠揀枝那忍折繞徑祇成愁

淡了猶紅在留渠肯住不無端萬銀竹判却一春休

戲綵堂前海棠

露揉雨漬柳方濃日晒風曛杏正烘祇有海棠非旋染

粟來大

音情

小便鮮紅

櫻桃花

櫻桃花發滿晴柯不賭嬌嬈只賭多落盡江梅餘半朵
依前風韻合還他

春寒

陣陣風寒樹樹斜不容老子出簷牙繡簾半掩門偏啟
深倚胡床遠看花

春陰忽霽

雲幙辛勤護日華一重穀子一重紗玉奩忽透菱花影
淡與油窗描杏花

過笪橋

輕風欲動没人知早被垂楊報酒旗行到笪橋中半
處鍾山飛入轎窗籬

登鳳凰臺

千年百尺鳳凰臺，送盡潮回鳳不回。
白鷺北頭江草合，烏衣西面杏花開。
龍蟠虎踞山川在，古往今來鼓角哀。
只有謫仙留句處，春風掌管拂蛛煤。

上巳寒食同日後圃行散

百五重三併一朝，風光不怕不嬌嬈。
鹿蔥引道心猶倦，楊柳簷門手對招。
筇未喚隨非是強，扇聊作伴不須搖。
先生道是無歌舞，花勸鶯醺酒自銷。

代書呈功父

不見子張子令人夢亦思只應依舊瘦近作幾多詩聯
句平生事看花去歲時海棠今好不傳語併酴醾

移瑞香花斛

夜掇香窠沐露華晝移翠斛馥窻紗將身挨起簾帷看
生怕簾帷挨着花

三月三日上忠襄墳因之行散得十絕句

暖轎行春底見春遮攔春色不教親急呼青繖小涼轎

又被春光著莫人

草藉輪蹄翠織成花圍巷陌錦幃屏
早來指點遊人處
今在遊人行處行

淮山脚下大江橫御柳梢頭絳闕明
覽盡山川更城郭
雨花臺上大竒生

天公也自喜良辰上巳風光忽斬新
點檢一春好天色
更無兩日似今晨

遊人不是上墳回便是清湍禊事來
最苦相逢無處避

天禧寺及雨花臺

女唱兒歌去踏青阿婆笑語伴渠行只虧郎罷優輕殺
搗子雙擔挈酒餅

粉捏孩兒活逼真象生果子更時新輸贏一擲渾閒事
空手入城羞殺人

長干橋外即烏衣合着屠沽賣菜兒晉殿吳宮猶碧草
王亭謝館儘黃鸝

除却鍾山與石城六朝遺蹟問難真里名只道新名好

不道新名悞後人

切記尋春預作謀
教君行樂定成愁
老夫乘興翩然出
不遣風知雨覺休

折花

指似青童折海棠
繁枝仍要艷花房
痴眉眼底生疎手
顫脫花房悶一場

行闕養種園千葉杏花

不信東皇也有私
如何偏寵杏花枝
於中更出紅千葉

且道此花奇不奇

白白紅紅兩不真
重重疊疊是精神
誰言跂石眠雲客
也見長楊五柝春

清明日雨雪來朝晴霽

清明一雨壞花時
梅杏櫻桃總脫枝
挽住落英供細舞
東風猶自妬游絲

清明一雪怪生寒
逗曉新晴雪未殘
要見海棠還傳粉
捲簾不徹急來看

海棠四首

小園不到負今晨晚喚嬌紅伴老身落日爭明那肯暮
艷粧一出更無春樹間露坐看搖影酒底花光併入唇
銀燭不燒渠不睡梢頭恰恰挂冰輪

暖醉寒醒各自奇千花誰是復誰非燕支濃透春風面
翡翠新裁茜色衣破落東皇能許媚莊嚴西子較些肥
痴兒猶恨無香在紫蝶黃蜂正打圍

競艷爭嬌最是他教人嫌少不嫌多初酣曉日紅千滴

晚笑東風淡一渦自是花中無國色非關格外占春窠
開時慳與渠儂醉却恨飄零可若何

吾詩多為海棠哦花意依前怨不多已折未開渾是韻
乍濃還淡總由他留連春色能如許請托東風未肯麼
豈是少陵無句字少陵未見欲如何

海棠唐詩多未見
至鄭谷詩方見

花下夜飲

夜深移入小杯盤回首花枝不忍看豈與海棠情分薄
老夫自是怯春寒

柳絮

寒勒花遲却速殘晴吹絮過忽吹還雪翻霽日光風急
毬袞回郎曲榭閒萬里雲天皆去處羣飛蹤跡恣中間
道渠催得春闌著春不緣渠獨不闌

折杏子

天暖酒易醺春暮花難覓意行到南園杏子半紅碧輕
風動高枝可望不可摘聳肩跂一足偶爾攀翻得翻條
初亦喜折條還復惜小苦已自韻未酸政堪喫聊將插

髻歸空樽有餘瀝

紅錦帶花

天女風梭織露機
碧絲地上茜纒枝
何曾繫住春歸脚
只解縈長客恨眉
節節生花花點點
茸茸曬日日遲遲
後園初夏無題目
小樹微芳也得詩

送劉覺之歸蜀

余少時師事清純先生
雋都知縣朝奉劉世臣
世臣令其子三人從余學
其季則覺之也覺之

流落大寧監後二十九年復相見於金陵為留
十日而別贈之長句

大江東西湖南北鵲袍學子森如竹何人開口不伊川
阿誰初道此水源清純先生劉夫子冷笑俗儒鑽故紙
夢中親見大小程為渠刺船入洙泗嗟我結髮從先生
日日看子趨鯉庭先生命子却從我小窻短檠共燈火
陋巷柴扉共寒餓安知頭上天幾大子今行李寄大寧
翩然策書游帝城袖中一卷經濟策天關九虎叫不應

朝來忽見毛生刺，看來看去更且喜。風花聚散三十年，
何許飛墮老眼前。相逢幾日又相別，珍重兩字不忍說。
我有故山江之西，應遣思歸不遣歸。贈行聊借退之詩，
石頭城下一杯酒。便是此生長別離。

跋徐伯益所藏張欽夫書西銘短紙

一高一下一中央，怙恃兼儂豈別房。撞過烟樓休劣相，
祇如郎罷也無良。

橫渠方幅著乾坤，傳到南軒更莫論。四海交朋霜葉落，

幾張翰墨雪濤翻

遊定林寺即荆公讀書處

鍾山已在萬山深更過鍾山入定林穿盡松杉行盡石
一菴猶隔白雲岑

一箇青童一蹇驢九年來往定林居經綸枉被周公誤
相罷歸來始讀書

半破僧菴半補籬舊題無復壁間詩祇餘手植雙桐在
此外仍兼洗硯池

踏月敲門訪病夫問來還是雪堂蘇不知把燭高談許
曾舉烏臺詩帳無

半山寺

即荆公
舊宅

霜松雪竹老重尋南蕩東陂水自深鳳去宅存誰與住
不如作寺免傷心

公哭元澤詩云
一日鳳凰去

老無穉子為應門病有毗耶伴此身相府梵宮均是幻
却須捨宅即離塵

日邊賜額寺名新雞犬猶迎舊主人見說小兒齊拍手

半山寺主裹頭巾

初夏即事

今日風光定自佳，不寒不熱恰清和。
百年人世行樂耳，一歲春歸奈老何。
芍藥晚花終是小，戎葵新荅許來多。
俸錢自笑渾無用，祇合文江買釣蓑。

賀建康帥余處恭迎寶公禱雨隨應

大夫多時不入城，入城猶未炷香熏。
忽吹淮水千峯雨，不費鍾山半朶雲。
桑葉秋苗俱起舞，葵花萱草亦懽忻。

尚書擬送歸來去留下豐年二十分

跋虞丞相與趙搏節使帖還其猶子濟

虞丞相與趙將軍同策江南第一勲大羽進賢今寂寞
凌烟頌裏感風雲

側磴一幅落雲烟意豁神傾歎兩賢從古將門長出將
眼看小阮勒燕然

送李君亮大著出守眉州

老夫句外自緣老復聞建鄴江山好不應夫子亦翻然

一挖江花更江草黃金宮闕三神山
蓬萊五雲霄漢間
仍將弱水三萬里隔斷塵世無往還
西州名勝李太史
豈徒國士天下士玉皇催入道山堂
知費臺家幾黃紙
似聞郎罷對薰風忽思錦江荔枝紅
人生奉親行樂耳
金印斗大何關儂峨眉山月却入手
影落庭闈一杯酒
蚤賦中和樂職宣布詩會看變龍集鳳池

晝倦

睡眼鬢鬆倦日長却拋詩卷步回廊
狸奴幸自雙雙戲

忽見人來走似獐

陪留守余處恭總領錢思提刑傅景仁游清涼寺即古石頭城

山自新亭走下來化為一虎首重回平吞雪浪三江水
卧對雨花千尺臺點檢故城遺址在淒涼浩歎宿霜開
六朝蹤跡登臨徧底事茲將獨壯哉

萬里長江天上來石頭却欲打江回青山外面周如削
紫府中間畫若開蘇峻戰場今草樹仲謀廟貌古塵埃

多情白鷺洲前水月白潮生聲自哀

寺後有吳大帝廟

已守臺城更石城不知併力或分營六師只遣還天闕
一壘真成借寇兵向者王蘇俱解此冤哉隗協可憐生
若言虎踞渾堪倚萬歲千秋無戰爭

和傅景仁游清涼寺

舊時月過女牆頭風雨摧頽廢不修地老天荒無處問
松聲灘響替人愁祥刑使者來何暮弔古詩篇清更幽
收拾江山入懷袖却歸講席進鴻疇

夏日雜興

金陵六月曉猶寒近北天時較少暄打盡來禽那待熟
半開萱草已先翻獨龍岡頂青山摺十字河頭別一痕
九郡報來都雨足插秧收麥喜村村

新亭送客

六朝豈是乏勲賢為底京師不晏然栢壁置人先一笑
楚囚對泣後千年鍾山喚客長南望江水流人懶北還
強管興亡談不盡枉教吟殺夕陽蟬

戲詠陳氏女剪綵花二絕句

拒霜

染露金風裏宜霜玉水濱
莫嫌開最晚元自不爭春

菊

味苦誰能愛香寒只自珍
長將潭底水普供世間人

謝余處恭送七夕酒果蜜食化生兒

踉蹌兒孫忽滿庭折荷騎竹臂春鶯
巧樓後夜迎牛女
留鑄今朝送化生
節物催人教老去
壺觴拜賜喜先傾

醉眠管得銀河鵲天上歸來打六更

予庚戌考試殿廬夜漏殺五更之後

復打一更問之雞人云宮漏有六更

新釀秦淮鴨綠均旋熬
粧妝蜜蜂果來禽濃抹日半臉
水藕初凝雪一梢豈有天孫千度嫁
枉同河鼓兩相嘲
渠儂有巧真堪乞不倩蛛絲罥果有

初秋行圃

今年六月不勝涼
七月炎蒸不可當
一陣秋風初過雨
箇般天氣好燒香

小小園亭亦自佳
晚雲雨過却成霞
爛開梔子渾如雪
已熟來禽尚帶花

花梢飛下兩鳴鳩
欲住還行復留
拾得來禽吞不得
啄來啄去竟成休

落日無情最有情
偏催萬樹暮蟬鳴
聽來咫尺無尋處
尋到旁邊却不聲

跋澹菴先生辭工部侍郎答詔不允

高卧崖州二十年
黑頭去國白頭還
身居紫禁鶯花裏

心在青原水石間

願挽天河洗北陸老臣底用紫荷為丹心一寸凌霜雪
祇有隆興聖主知

跋澹菴先生繳張敬夫賜章服荅詔

平生師友兩相知苦為君臣惜一時今古爭來爭不得
青蠅猶傍太陽飛

紫綬當時賜兩人一為乳臭一名臣老韓不要令同傳

誰會先生此意真

是時同日敬夫與一吳氏
子同賜命服獨繳敬夫

中元前賀余處恭尚書禱雨沛然霑足

數點飄聲供晚晴二更傾瀉到天明雷驅雲氣如旋磨
雨徧山村却入城簾面頓無秋後暑簷牙最愛夢中聲
尚書幸有為霖手偏洒江東作麼生

竹床

已製青奴一壁寒更搯綠玉兩頭安誰言詩老眠雲榻
不是漁郎釣月竿醉夢那知蕉葉雨小舟親過蓼花灘
蹶然驚起天將曉窻下書燈耿復殘

中元日午

雨餘赤日尚如炊亭午青陰不肯移蜂出無花絕糧道
蟻行有水過歸師今朝道是中元節天氣過於初伏時
小圃追涼還得熱焚香清坐讀唐詩

偶成

珍禽飲盆池將扇撲窻戶一聲驚得飛再聲驚不去

秋日早起

我眠亦甚安夢中初無驚如何作夢語反側意不寧起

來不復寐郡樓過五更窓紙尚昏昏晨到漸次明卷簾
啟後戶披衣步中庭汲井漱新泉滿面吹寒水仰看天
宇曠微白復淡青猶掛爛銀梳未昇紫金鉦砌蛩餘夜
唧樹鵲作曉鳴羣動俱擾擾競若有所營而人居其間
獨與免夙興三出三見秋一年一征行今茲秋又至歸
心捺還生會當挂其冠高卧聽松聲

誠齋集卷三十一

欽定四庫全書薈要卷一萬五千六百九

集部

誠齋集卷三十二

宋 楊萬里 撰

詩

江東集

月臺夜坐

秋日非無熱秋宵至竟清老夫連數夕露坐到三更風
急星明滅雲行月送迎追驩迎不得驩却偶然成

日落片時許星殘數點明
須臾玉棊子徧滿碧瑤枰
向晚垂垂雨通宵得得晴
秋蛩伴儂語苦底是誰聲

初涼與次公子共讀書冊

暑嬾歸投簟涼醒打當書
罷吟唇欲裂起坐膝難舒
汲古微瀾動悲秋小雨餘
五言未針線百線過堦除

後圃秋步

夏簟秋新妬暄窻冷早侵病
葵萱未悟落果草偏深老
矣曾榮望歸歟更嬾心
此冠彈與掛若箇不山林

戲用禪觀荅曾無逸問山谷語

昨日評諸家詩偶入禪觀如杜之詩法出審言
句法出庾信但過之耳白樂天云笙歌歸院落
燈火下樓臺不如杜子美云落花將絲白日靜
鳴鳩乳燕青春深也孟浩然云氣蒸雲夢澤波
撼岳陽城不如九僧云雲間下蔡邑林際春申
君也漫及之右山谷語無逸云見墨蹟於張功
父處功父云屢問人不曉

前世人間無漏仙後說世上無眼禪
衲子若全信佛語
生天定在靈運前

聽蟬八絕句

披襟散髮晚風清細細孤斟緩緩行道是江東
官事冗
綠楊陰裏聽蟬聲

一隻初來報早秋又添一隻說新愁
兩蟬對語雙垂柳
如關先休關後休

渠與斜陽有底讎千冤萬恨訴清秋
更從誰子做頭抵

只放斜陽不落休

一殼空空紙樣輕風前却有許多聲
叫來叫去渾無事
叫到詩人白髮生

說露談風有典章詠秋吟夏入宮商
蟬聲無一些煩惱
自是愁人枉斷腸

乍來乍去為誰忙短氣誰教強作長
道是渠儂聲不歇
一吟一續萬低昂

望帝啼春夜更多不知蟬意却如何
還來入夜便無語

明日將詩理會他

罪過渠儂商略秋從朝至暮不曾休莫嫌入夜還休去
自有寒蛩替說愁

行部有日喜雨

一雨天良苦連宵釀不成強摩昏睡眼來看滴堦聲環
細開來大音情珠跳滅又生稻花知我出噴雪待相迎

八月朔曉起趣辦行

雨後晨先起花間濕也行破除婪尾暑領略打頭清蠹

果無時落枯枝忽再榮便須秣吾馬及此半陰晴

行部暫辭金陵同列有感

爽氣來江外秋容上柳梢生遭女嬃罵老解子雲嘲衰
病聊飛屐行藏鎮打包君看社後燕還憶社前巢

木犀初發

可笑詩人山澤臞平生枯淡不敷腴已搜杞菊到詒厥
絕與木犀親友于按入杯中金粟走滿澆天上桂花孤
醉眠繞枕兩三朵香水去聲肝脾酒更無

明發金陵晨炊義井

薄薄雲收日霏霏雨散池平波光去遠踈點暈來遲所
部餘千里初程第一詩先驅問行李雙堠且晨炊

道傍槿籬

夾路踈籬錦作堆朝開暮落復朝開抽心粗糲輕拖糝
近蒂燕支蘸抹顚占破半年猶道少何曾一日不芳來
花中却是渠長命換舊添新底用催

圩田

週遭圩岸繚金城一眼圩田翠不分行到秋苗初熟處
翠茵錦上織黃雲

古今圩岸護隄防岸岸行行種綠楊歲久樹根無寸土
綠楊走入水中央

蚤起稜鎮

人趁村中市鷄鳴檐上籠忽看一天紫未吐半輪紅誰
撼扶桑露吹來楊柳風詩肩忍涼冷已出兩髑峯

山路祇言迥農家俱夙興短長羣穉子回避一田塍隨

犬能知路騎牛底用繩茲行有勝事何處不豐登

觀稼

井字行

音杭

都整花香遠已甜穗肥黃俯首芒勁紫掀髯

風攪平雲陣霜鬆缺月鑰不愁禾把減高廩却愁添

路口回望方山

鍾阜回頭失方山戀眼寒似巾簷短帽如覆玉凋槃每
恨青蒼遠因行反覆看歸時記面目城裏指雲端

甯橋小渡

橋壞仍泥滑舟橫隔水呼岸頭危徑窄轎子莫人扶午
漏相將裏秋陽未肯無明知近前店暗覺展脩途

橫山

已過方山了橫山更絕奇爭高一尖喜妬逸衆青追萬

馬頭驚拶千旗脚恣吹嬾峯恰三五隔柳尚參差

凡十五峯

南數起第

三高尖

入漂水界閱堠子

纔入漂水界休教勤吏民是誰差堠子久立待車塵苔

辭今仍古風霜秋復春不知雙與隻迎送幾行人

午憩方虛坐睡

午暑殘偏力長亭歇未行睡鄉蠅倣擾詩陣筆專征今
夕南吾枕何時北我旌不應菊花酒兒女不同傾

樊京

冊文不做也由伊做了何須死不辭可惜一盃金屑酒
飲來祇較早些時

方虛日斜再行宿烏山

日已哀容去風仍劈面來征徒歇得醒老子不須催綠

蔭涼過

平聲

傘黃泥晒作埃恍然片雲起半霎又吹開

多稼村村過垂楊店店迎偶然逢客子問得好山名投
宿欣猶早斜陽落更明僕人休進扇得似晚風清

發烏山入溧水縣中山驛

雨脚依山見風頭觸樹回泥深行不去轎兀睡還來相
相情微適喧喧眼竟開夢殘那可續續得轉悠哉

圩丁詞十解

江東水鄉隄河兩岸而田其中謂之圩農家云
圩者圍也內以圍田外以圍水蓋河高而田反
在水下沿隄通斗門每門疏港以溉田故有豐
年而無水患余自溧水縣南一舍所登蒲塘河
小舟至鎮水行十二里備見水之曲折自上池
陽下至當塗圩河皆通大江而蒲塘河之下十
里所有湖曰石臼廣八十里河入湖湖入江鄉
有圩長歲晏水落則集圩丁日具土石槌枝以

脩圩余因作詞以擬劉夢得竹枝柳枝之聲以
授圩丁之脩圩者歌之以相其勞云

圩田元是一平湖憑仗兒郎築作圩萬雉長城倩誰守
兩隄楊柳當防夫

何代何人作此圩石頑土膩鐵難如年年二月桃花水
如律流歸石臼湖

上通建德下當塗千里江湖繚一圩本是陽侯水精國
天公勅賜上農夫

南望雙峰抹綠明一峯起立一峯橫不知圩裏田多少
直到峰根不見塍

兩岸沿隄有水門萬波隨吐復隨吞君看紅蓼花邊腳
補去脩來無水痕

年年圩長集圩丁不要招呼自要行萬杵一鳴千畚土
大呼高唱總齊聲

兒郎辛苦莫呼天一歲脩圩一歲眠六七月頭無滴雨
試登高處望圩田

岸頭石板紫縱橫不是脩圩是築城傳語赫連莫蒸土
霸圖未必賽春畊

河水還高港水低千支萬派曲穿畦斗門一閉君休笑
要看水從人指揮

圩上人牽水上航從頭點檢萬農桑即非使者秋行部
乃是圩翁曉按莊

宿孔鎮觀雨中蛛絲

雨打蛛絲不打蛛雨來蛛入畫簷隅網羅滿腹輸渠巧

也只蠅蚊命屬渠

雨罷蜘蛛却出簷網絲小減再新添莫言辛苦無功業
便有蜚蟲密處粘

空中仰面却飛身寂似毘耶不動尊忽有一蚊來觸網
手忙腳亂便星奔

走得團團織得窠羣飛來往不逃他網羅外面逃多少
枉了辛勤設網羅

網羅最密是蛛絲却被秋蚊聖得知粘著便飛來不再

蛛絲也解有踈時

蛩聲

山行我已厭征塵
夜語誰能伴老身
幸有暗蟲同店宿
被渠告訴却愁人

床根吟夜句
冥搜莎底啼
寒泣怨愁人
世如何無苦樂
一般蟋蟀兩般秋

莫憎苦調太酸辛
月思霜哀亦可人
村落小家無此客
溧陽少府是前身

發孔鎮晨炊漆橋道中紀行

夢中一夜雨浪浪曉過田間尚雨香塘水溉田能幾許
雨餘田水却歸塘

可堪衰病兩相纏更苦懸車尚五年羨殺雨中山上水
留他不住竟歸田

雨入秋田恰及時禾頭相枕卧相依路南路北皆秋水
淨洗行人屨上泥

不但秋原雨冒田坐看平地路成川隔田山下青松外

不見人家只見煙

斫地燒畬旋旋開
豆花麻莢更耘栽
荒山半寸無遺土
田父何曾一飽來

君看人跡蝶來輕
踏得林間路作坑
古路今人行不得

一時移上^{上聲}頭行

行穿詰曲更崔嵬
野店柴門半未開
皂莢樹陰黃草屋
隔離犬吠出頭來

雨入秋空細復輕
松梢積得太多生
忽然落點拳來大

偏作行人滴傘聲

清曉新涼愜老懷只愁僕從可憐哉
泥行寸步無由到雨去山前却復回

水夾橫隄柳萬枝雨餘新沐更新梳
柔條如線長而細不貫雙魚只貫珠

過平公橋

高岸行成路清渠淡不波
荇花深似菊茨葉皺于荷
聞道新橋好還成帶雨過
如何平氏店宿處不聞他

水漚

淡日輕雲雨點疎
水漚隨雨起清渠
跳來走去瓊漿裏
剗見龍宮徑寸珠

至寶何緣識得全
驪珠浮沒只俄然
金仙額上莊嚴底
只許凡人見半邊

攸山望石臼湖

雨中深閉轎窗紗
驚見孤光射眼花
一顧平湖山盡處
碧銅鏡外走青蛇

野店二絕句

不勞官吏出將迎
山店如何遠有聲
人報官來爭出看
牛逢轎過忽然驚

山店茅柴強一杯
梨酸藕苦眼慵開
深紅元子輕紅鮓
難得江西鄉味來

菱沼

柄似蟾蜍股樣肥
葉如蝴蝶翼相差
蟾蜍翹立蜨飛起
便是菱花着子時

山村

一搭山村一搭奇，不堪風物索新詩。
稻花雪白糝柳絮，柘子猩紅團荔枝。
行者自愁居者樂，晴時即熱雨時泥。
問知桐汭多程在，未說宣城與貴池。

歇處何妨更歇些，宿頭未到日頭斜。
風烟綠水青山國，籬落紫茄黃豆家。
雨足一年生事了，我行三日去程賒。
老夫不是如今錯，初識陶泓計已差。

發銀樹林

莫過溪橋銀樹林溪深未抵路泥深清風一陣掠人面
晴色半開關客心遠嶺惹雲秋裏雪淡天刷墨曉來陰
幾多好句爭投我柳奪花偷底處尋

入建平界

溧水南頭接建平了頭兒子便勤畊疎麻大豆已前輩
蕎麥晚菰初後生席卷千山為一圓天憐春種賜秋成
不如老圃今真个樊子何曾透聖局

一歲昇平在一收今年田父又無愁接天稻穗黃嬌日

照水蓼花紅滴秋風有炎涼纔頃刻雨無朝暮政滂流
浪言出却建平界入却廬陵界始休

早炊童家店

長亭深處小亭奇雜蘗粗蕤亦有姿羊角豆纏松葉架
雞冠花隔竹槍籬不辭雨卧風餐裏可惜橙黃橘綠時
行到前頭楊柳迎平分紅白兩蓮池

過謝家灣

行盡牛蹊免遇中忽逢平野四連空意隨白鷺一雙去

眼過青山千萬重近嶺已看看遠嶺連峯不愛愛孤峯
一丘一壑知何意踈盡官人着牧童

轎中看山

買山安得錢有錢價不賤住山如冠玉人見我不見世
言游山好一峯足雙繭峯外復有峯歷盡那能徧不如
近看山近看不如遠請山略退步容我與對面我行山
欣隨我住山樂伴有酒喚山飲有款分山饌隔水絕荒
寒縈雲偏倩絢雨滋青彌深日炫紫還淺端居忽飛動

遐逝即回轉孤秀呈復逃層尖隱還顯掇入轎中來置
在几上玩劣行三兩驛已閱百千變非我去旁搜皆渠
來自獻寄言有山人勿賣亦勿典金多汝安用價重山
亦怨估若為我低傷廉又非願山已在胸中豈復有餘
羨羨心固無餘更得山一看

嘲蜻蜓

餌花春蝶即花仙飲露秋蟬怕露寒只道蜻蜓解食水
元來照水不曾食

發中橋

溫轎乘涼入斜燈借路明
柳欹元不倒橋閣自多驚宿
雷停殘滴朝曦放快晴
溪流太無賴不作一聲聲

新雨豐今歲初晴屏積陰
猛收千足練微露一稜金
天熨粉青嫩山抽愁黛深
誰言殘剩暑卓午不相尋

早炊高店

過雨溪山十倍明
乍晴風日一番清
白鷗池沼菰蒲影
紅棗村虛雞犬聲
食肉坐曹良媿死
囊衣行部亦勞生

不堪有七今成九
僂父年來老更僂

午熱憩中義渡

秋陽嗔我緊追程
急泊臨流一短亭
摘索風巾些子倦
蒼茫水枕霎時醒
單牌雙堠頭都白
萬壑千岩眼強青
不及溪邊老亭父
一生卧護竹窓櫺

宿雞林坊

路覺往而復意迷
東與西元來八九渡
只是一條溪
亭午雖微暑
茲晨較少泥
諸峯雲上出
不但與雲齊

草有青無俗田生不用畊
菰花凋品字荇葉缺錢文
出水浮難沒搖風淨更芬
物情豈難狀作麼未前聞

初九夜月

珍重姮娥住廣寒不食火食不食烟
秋空捨得一團餅
隨手如何失半邊

也知月姊是天姝天上人間絕世無
霧掃雲撩何不可
却須插一水精梳

村店竹床

村店事事無秋熱夜夜至一隻好竹床無人將去睡

問月二首

月色幸自好元無半點雲移床來一看雲月兩昏昏
月入雲中去呼他不出來明宵教老子何面更相陪

將睡四首

老夫豈不眠只是眠未得若到睡思來華胥是誰國
一更打二點夜夜此時睡今夜當此時不睡緣底事
已被詩為祟更添茶作魔端能去二者一武到無何

睡去非不願熟來無奈何
蒙渠致西爽為汝守南柯

曉行望雲山

霽天欲曉未明間
滿目奇峰總可觀
却有一峰忽然長
方知不動是真山

歸雲

可殺歸雲也愛山
夜來都宿好山間
偶看一絮翻然起
引得萌滕相趁還

三足雞兒出海東
飛光一點染天紅
只銷半點歸雲動

立地蒙蒙暗太空

坐看山頭生宿雲一雲纔動萬雲奔
霍然散作千樹霧
遠處昏來近處昏

日出

散雲作霧恰昏昏收霧依前復作雲
一面紅金大圓鏡
盡銷雲霧照乾坤

道傍店

路傍野店兩三家清曉無湯況有茶
道是渠儂不好事

青瓷瓶插紫薇花

蛛網

深山無水又無人
晒網攤罾奪目明
却是蜘蛛遭積雨
經綸家計趁新晴

加食

脫髮星星變加食
日日新二升卧龍玉
一斗謫仙春雲
子恐稱屈麴生能笑人
吾方有公事公等不須嗔

道傍竹

竹竿穿竹籬却與籬為柱大小各相依榮枯何足顧

曉行山煙

曉煙橫抹碧山隅只在松梢足練如作意行前尋一看
遠濃近淡忽都無

雨漱紫泥

道傍雨漱紫浮泥高底成山下底溪谷轉峰回雲出岫
沙翻石走草緣堤波生蟋蟀漂新宅水落蚍蜉識舊溪
大地山河亦如此看來只是許高低

炬火發誓節渡曾家店

飄燼飛空落曉星隨風入草化秋聲
莎蟲誤認天明了却變寒聲作暖聲

昨午秋陽尚壯哉今晨莫待日光催
麻蒸一照三十里底用金蓮花炬來

曉過花橋入宣州界

路入宣城山便奇蒼蚪活走綠鸞飛
詩人眼毒已先見却旋褰雲作翠幃

敬亭宛水故依然疊嶂雙溪阿那邊謝守不生梅老死
情誰海內掌風烟

近山淺綠遠深青兩樣風姿一樣清似怨朝陽卷雲霧
被儂看著太分明

不是青山是畫圖南山瘦削北數腴兩山名姓君知麼

一字玄暉一聖俞

南山名文眷
北山名敬亭

野店多賣花木瓜

天下宣城花木瓜日華露液繡成花何須堠子強成界

欽定四庫全書

誠齋集
卷三十二

自有瓊琚先報衙

誠齋集卷三十二

欽定四庫全書薈要卷一萬五千六百十

集部

誠齋集卷三十三

宋 楊萬里 撰

詩

江東集

花果

野花山果絕芳馨
借問行人不識名
蜂蝶行糧猿鶴飯
一生口分兩無爭

午熱

也無半點爽風吹坐轎分明是甌炊宿處問來猶五里
火輪煽得正炎時

月中炬火發仙山驛小睡射亭

道是宵征即曉光若言明發未朝陽月華露氣山蕪水
亭盡人間第一涼

踏月何須秉燭行也防月落未天明果然留下長庚去
更賺行人作曉星

月輪已落尚殘光一似西山沒夕陽次第長庚都落去
日華猶未出扶桑

長庚初讓月先行不料姮娥有世情趣駕冰輪渡銀浦
亂拋玉李擲長庚

轎中兀得軟如痴逢店投床片子時睡覺不知天曉未
半窗花影木犀枝

斗瓠

笑殺桑根斗瓠苗亂他桑葉上他條向人更逞瘦藏巧

怪道桑梢挂一瓢

五更入宣城詣天慶觀朝謁

曉露雙溪水秋風百舫橋行穿子城過却望女牆遙落
月能相伴疎鐘似見招小亭憩山半換馬上岩堯

中秋前一夕雨中登雙溪疊嶂已而月出

州在三峰最上頭上頭高處更高樓都將萬壑千岩景
堆作雙溪疊嶂秋晚雨纔收山畫出暮天似水月如流
敬亭堪喜還堪恨領得風光攬得愁

樓正北對敬亭山

雙溪疊嶂舊知名投老初登眼不醒一雨飛來四天黑
亂雲遮斷萬峯青急呼月色開秋色奪得昭亭與敬亭
自笑詩翁猶狡獪不饒山鬼弄精靈

昭亭山有
上昭下昭

新涼

毛空兩日散霏微勒住陰雲且四垂一路新涼君會否
晴無日色雨無泥

中秋無月色宿青弋江行新寒

新寒催我索衣裘涼雨淒雲摠是愁耐得素娥今老去

夜來挂殿罷中秋

秋花

顛顛牽牛病雨些凋零木槿怯風斜道邊籬落聊遮眼
白白紅紅扁豆花

過青陽縣望九華山雲中不真來早大霧竟
不見其全

山長百里玉孱顏百里何緣盡好山只是縣前青一簇
九芙蓉出五雲間

肩輿過了九華西恨殺秋雲故故低遮盡奇峰時放出
逐峰放出不教齊

懊惱西來不見山五更指準月中看却將香霧寬裁幕
性燥和天總一般

四更發青陽縣五里柯家店

轎中萬兀路千縈死盡村鷄無一鳴落月正明知未曉
暗泉甚遠只聞聲自緣客子行來早豈是秋天不肯明
午熱未來先下店却將晝睡補宵征

宿池州齊山寺即杜牧之九日登高處

我來秋浦正逢秋夢裏曾來似舊遊
風月不供詩酒債江山長管古今愁
謫仙狂飲顛吟寺小杜倡情冶思樓
問着州民渾不識齊山依舊俯寒流

齊山五洞其一曰妙峯峯下有山谷

從提舉黃元章登齊山寺後上青岩翠微亭
望郡城左青溪右大江蓋絕境云

西山落日浴晴江併貫清溪作一光
千嶂圍來天四合孤城漏出水中央
樓臺玉塔雲間見楊柳金隄鏡裏長

客子要窮秋浦眼翠微亭上上清芳

秋浦登舟阻風泊池口

午眠化蝶化未成夢中湏洞發大聲軍聲雷鼓百千面
援桴齊下作一鳴起來推窗無一物海潮打入齊山窟
數州翻覆相盪摩四山動搖皆突兀錢塘潮來聲驚天
金陵潮來聲寂然此去金陵一千里那得潮聲來到此
長年三老笑復嘲云是波聲不是潮清溪波頭高過屋
大江波頭發日轂清溪去江一百步大江可望不可至

北風向晚動地來跳出銀峯萬萬堆儂船莫管行不得
且看銀峯永今夕

池口移舟入江再泊十里頭潘家灣阻風不
止

北風五日吹江練江底吹翻作江面大波一跳入天半
粉碎銀山成雪片五日五更無停時長江倒流都上西
計程一日二千里今踰艱瀕到峨眉更吹兩日江必竭
却將海水來相接老夫早知當陸行錯料一帆超十程

如今判却十程住何策更與陽侯爭水到峨眉無去處
下梢不到忘歸路我到金陵水自東只恐從此無南風
舟中買雙鰕魚

金陵城中無纖鱗一魚往往重六鈞脊梁專車尾捎雲
肉如大武千秋筋小港阻風泊烏舫舫前漁艇政收網
一隻白錦跳銀刀玉質黑章大如掌洞庭張子青欲黃
香膚作線醢作漿供儂朝吃復晚吃禿尾槎頭俱避席
可憐秋浦好秋山儂眼未飽即北還江神挈月作團扇

一夜揮風卷波面留儂看山仍看江更薦鮮魚庖玉霜
江神好意那可忘江神惡劇那可當

舟中排悶

江流一直還一曲淮山一起還一伏江流不肯放人行
淮山只管留人宿老夫一出緣秋涼半塗秋熱難禁當
却借樓船順流下逆風五日殊未央老夫平生行此世
不自為政聽天地只今未肯放歸程安知天意非奇事
平生愛誦謫仙詩百誦不熟良獨痴舟中一日誦一首

誦得徧時應得歸

舟過大通鎮

淮上雲垂岬江中浪拍天順風那敢望下水更勞牽蘆
荻偏留纜漁罾最礙船何曾怨川后魚蟹不論錢

從丁家洲避風行小港出荻港大江

蓼岬藤灣隔盡人大江小汊繞成輪圍蔬放荻不爭地
種柳堅堤非買春匏瓠放教俱上屋漁樵相倚自成隣
夜來更下西風雪蕎麥梢頭萬玉塵

荻籬瀟灑織來新茅屋橫斜畫不真乾土種禾那用水

園中有禾

濕蘆經火自成薪

新蘆卧地而大其枝葉

島居莫笑三

元非田畝

百里菜把活他千萬人

丁家洲闊三百里只種蘿蔔賣至金陵

白浪打天

風動地何曾驚着一微塵

蘆揮麈尾話清秋柳弄腰支舞綠洲引得江風顛入骨
戲拋波浪過於樓十程擬作一程快一日翻成十日留
未到大江愁未到大江到了更添愁

江天暮景有歎

只爭一水是江淮日暮風高雲不開白鷺倦飛波政闊
都從江上過江來

一鷺南飛道偶然忽然百復千千江淮捻屬天家管
不肯營巢向北邊

江行七日阻風至繁昌舍舟出陸

日日江行怖殺儂逆風惡浪打船蓬只今判却肩輿去
遮莫掀天浪與風

山行辛苦水行愁只是詩人薄命休管取如今遵陸了

雲開風順水東流

過宜福橋

水鄉澤國最輸農
無旱無乾只有豐
碧豆密爭桑蔭底
綠荷雜出稻花中
是田是沼渾難辨
何地何村不一同
若遣明年無種子
却愁閒殺雨和風

過若山坊進退格

綠漲空中幄黃鋪地上雲
風條鈎過轎雨穗沒行人夾
路桑千樹平田稻十分
泥行殊不惡物色逐村新

宿我橋化城寺

一溪秋水一橫橋近路人家却作遙
柳遶溪橋荷遶屋何須更著酒旗招

忽從平地上高城乃是圩塘隄上行
厚賽柳神銷底物長腰雲子闊腰菱

過石碗渡

我橋小渡十里長石碗小渡五里強
斜風細雨寒蘆裏下有深潭黑無底
渡船劣似紙半張五里却成一千

中流風作浪如山前進不得後退難隔溪市井只咫尺
安得飛墮於其間大江風濤堪着力小渡風濤更無極
咫尺性命輕如毛只恐一毛猶不直

天絲行

天孫嬾困拋雲機却倩月姊看殘絲玉兔偷將乞去聲風

伯和機失却天未知風伯得絲那解織未嘗躬桑那解
惜掀髯一笑戲一吹散入寒空收不得曉來翠額瑩無
痕片雲忽裂落頰根須臾吹作千縷銀乃是天絲不是

雲遠山成練不曾捲近林成紗未輕剪坐着斜飛拂面
來分明是絲尋不見元來着面化成水是水是絲問誰
子

怪菌歌

雨前無物撩眼界雨裏道邊出奇怪數莖枯菌破土膏
即時便與人般高撒開圓頂丈來大音情一菌可藏人一

箇黑如點漆黃如金第一不怕驟雨淋得雨聲如打荷
葉脚如紫玉排粉節行人一箇掇一枚無雨即闔有雨

開與風最巧能向背忘却頭上天倚蓋此茵破來還可
補只不堪餐不堪煮

曉晴發蕪湖縣吳波亭

八日川塗九雨風船中出得一泥中老夫強項誰能那
雨止風休伎自窮

雨來初做養禾天雨久還成害稼年今日一晴無準在
金鷄飛去邛牌前

晨炊翫鞭亭

老賊平欺晉鼎輕一輪五色夢中驚寶鞭脫急非無策
何似休將日遶營

問着何人是阿兄坐看家賊只吞聲戮屍大放經綸手
長柄判平聲將錫茂弘

過懶橋湖

圩路抨絃白圩溝夾柳青藻明潛撥刺日暖凍蜻蜓只
箇新茅屋分明是水亭行來惟恐盡覽處不容停

望謝家青山太白墓

阿眺青山自一邨州民歲歲與招魂六朝陵墓今安在

只有詩仙月下墳

墓次有菴菴中有太白祠州郡歲遣教授祭之

玄暉舊宅略無存太白來游愛是間占作醉眠床一隻

謝家山是李家山

州民上塚踏青畢集祠下

登牛渚蛾眉亭

在采石廣濟寺

謫仙攜妓戲人寰也被千花妬玉顏半點閒情千古恨
一波秋水兩春山錦袍宮燭雲霄上白苧烏紗江海間
欲寄雙魚招醉魄月輪捉了蚤言還

山拆江通萬里流菱花雙照兩眉頭掃除却月橫雲樣
別有顰風感雨愁明月入波那可捉長庚伴月本同遊
君看夜夜青天上渠與姮娥分管秋

亭旁有一片石曰捉月臺

宿牧牛亭秦太師墳菴

函關只有一穰侯瀛館寧無再帝丘天極八重心未死
台星三點圻方休只看壁後新亭策恐作移中屬國羞
今日牛羊上丘壠不知丞相更嗔不

暮年起大獄必殺張德遠胡邦衡等

五十餘人不知諸公殺盡將欲何為奏垂上而卒故有新亭之句然初節似蘇子卿而晚繆

雁來紅

開了元無雁看來不是花
若為黃更紫乃借葉為葩
藜莧真何擇雞冠却較差
未應犀菊葦赤脚也容他

早炊新林望見鍾山

辭俸鍾山一月前如何知我北歸軒
不通姓字慙慙甚忽到新林野竹邊

兒姪新亭相迎

送客新亭恰放燈兒曹迎我復新亭
百年事業何為者

送往迎來過一生

送孫從之司業持節河南

全家先遯却誰知匹馬西歸也大奇
出晝莫嫌三宿戀懷麻不待七年遲
風生折檻人無古水遶園橋士有師
六一澹菴喬木在今秋新長雪霜枝

白頭燈火共書林自少論交老慰心
官職壞人飭裏鳩忠賢到骨鍛中金
朝陽鳴鳳祗今在夜雨對床何日尋
回雁峯前雁回後紫薇紅藥待渠吟

跋天台王仲言乞米詩

敢言縮項更長腰，黃獨青精也絕苗。
尚有囊中餐玉法，藍田山裏過明朝。

十月朝補種杏花

百株種杏自今春，度夏榮枯不解勻。
要看補栽新樹子，茶蘼紅刺絳頭巾。

下元日詣會慶節所道場呈余處恭尚書

琳宮朝謁早，追趨漏盡銅壺殺點初。
半縷碧雲橫界月。

一規銀鏡裂成梳，自拈沉水祈天壽。
散作非煙滿玉虛，已被新寒欺病骨。
柳陰偏隔日光疎。

余處恭和

殊庭冠佩儼晨趨，聯轡朝真下馬初。
簾透暗曦金碎剪，霜彫細柳髮新梳。
三呼獻瑞聞班列，萬籟收聲入步虛。
祝聖歸來無一事，時平翻恨酒杯疎。

和余處恭贈方士閻都幹

河出崑崙江出岷，風吹不斷浪花春。
但看此水源無竭，

底用玄談谷有神老健便為仙放杖斧斤祇在韞生塵
東家自有神仙訣方士何曾悟一真

題槿查紅葉

槿查將葉學丹楓戲與攀條撼晚風一片飛來最奇絕
碧羅袖尾滴猩紅

拾栢子

皺殼傾來紫麥新中藏瓊米不勝真胡桃松實何曾喫
却嚼秋風栢子仁

新酒歌

官酒可憎老夫出家釀二缸
一曰桂子香一曰清無底
風味冷冽歌以紀之

酸酒壅湯猶可嘗甜酒蜜汁不可當
老夫出奇釀二缸生民以來無杜康
桂子香清無底此米不是雲安米此
水祇是建鄴水甕頭一日遶數巡
自候酒熟不倩人松槽葛囊纔上榨
老夫脫帽先嘗新初愁酒帶官釀味
一杯徑到天地外忽然玉山倒甕邊
只覺劍鉞割腸裏杜

撰酒法不是儂此法來自太虛中酒經一卷偶拾得一
洗萬古甜酒空酒徒若自嘗儂酒先挽天河濯渠手却
來舉杯一中之換君仙骨君不知

睡覺

小醉如無酒寒宵似度年覺來因記夢醒去不成眠萬
事從心下三更到眼前清愁政無那一雁叫霜天

菜圃

此圃何其窄於儂已自華看人澆白菜分水汲黃花霜

熟天殊暖風微旆亦斜笑摩挑竹杖何日挂還家

觀花

道是東風巧西風未減東菊黃霜換紫樹碧露揉紅須
把乖張眼偷窺造化工只愁失天巧不悔得詩窮

冬暖

小春活脫是春時霜熟風酣日上遲晚蝶頻栖殘攏葉
驚禽衝過倒垂枝暫閒何似長閒好無事非關了事痴
三徑一筇人不見假山以外菊花知

至後睡覺

匆匆又過一陽生，睡恰濃時夢忽驚。
簾幕深沈人四寂，階除點滴雨三更。
燈搖芒角開成暈，風吸窻櫺過後聲。
不是寒雞寒似我，如何不肯喚天明。

送江東集與王謙仲樞使樞使和至後睡覺
一首

池塘春夢草初生，江左詩來得我驚。
開帙快觀醒倦眼，挑燈細讀度寒更。
追叅李杜今無敵，揮斥侯劉獨有聲。

一首敬酬三百首深慙坡老和淵明

寄題王亞夫檢正不啻足齋

既得隴復望蜀未求寶劍先求玉秦相後車一千轂唐
相胡椒八百斛黃金肘印駕黃鸝身前佞佛身後福九
潦瀉入無底谷匹似人心猶易足九州四海王同年三
江五湖春水船便應犯斗入月邊餘事猶堪濟巨川天
風吹來墮人寰水精宮裏作詩仙寄牋排雲叫穹昊願
錫江湖散人號玉皇留渠作豐年早晚喚歸香案前詩

仙掉頭不肯住田園將蕪夢歸去括蒼山勝道場山向
來結茅非霧間齋房恰則斗來大去聲中藏世界三千个
門前蠻觸戰方酣鼻息如雷政高卧

題王亞夫檢正峴湖堂

西峴山光照舊廬北湖水色漾新居翠鬟夜欲凌波去
玉鏡晨當掃黛初萬壑千岩雙不借輕風細浪一夫須
來書便當催詩雨雪後燈前卷復舒

書來催詩
甚急故云

壬子正月四日後圃行散

淡日微舒又急收
兜羅絲隔紫燈毬
更時數點無聲雨
不濕人衣却濕頭

勃姑偶下小梅枝
要看渠儂褐錦衣
柱後藏身教不見
却因不見轉驚飛

雙鵲營巢浪苦辛
棟條銜折不辭頻
舊條老硬新條軟
却向籬根拾落薪

傳語春光恰好儂
太穠恐怕惱良翁
日華五色無尋處
只在蛛絲來去中

雪後霜晴元宵月色特奇

玻璃盆瀉瑠璃水素娥晚粧欲梳洗報道虛皇築雪宮
一架半間三萬里却嫌廣寒未苦寬要借新宮作上元
先煩玉妃整羽衛次遣青女褰雲關渠儂舊有七寶藏
封在瓊樓樓頂上中藏腦子萬斛強輕明片片梅花樣
急呼滕六取將來更和瑞葉按作埃狂拋亂撒不停手
滿空碎下真珠胎乾坤立變水精闕雲衢透冷天街滑
姮家催索冰霜袍肌粟衣銖添不徹銀輪凍作一團冰

望舒墮指推不行
兔啼蟾泣滴成露
海東飛上金鴉精
清曉出郭迎客七里莊

却為迎賓得探春
白門官柳早尖新
如何霜瓦纔逢日
半作青瑤半作銀

偏得春憐是柳條
腰支別作一般嬌
微風不動渠猶舞
剛道春風轉舞腰

探杏

紅藍細細糝晴包
紫玉森森走膩條
枯梗折教無一寸

併驅春力奔

去聲

花梢

曾見乾條撼雪飛一暄爆出萬萼枝從人日日須來看
看得紅紅白白時

梅花

東風微破野梅心著骨清香已不禁綠刺一尖雙苓子
錯書小字帶懸針

帶雪雖奇祇粉粧酣晴別是好風光却綠白日青天裏
照得花明暖得香

跋汪省幹詩卷

向來劉翰有詩聲近日汪經更得名月在梅梢冰在月
與君句子各爭清

自古詩人太瘦生可憐辛苦選虛名詩家雜壓君知麼
壓盡三公況九卿

和謝石湖先生寄二詩韵

老夫寄江東集與石湖先生先生寄詩一首稱
江東集一見寄石湖洞霄集和以謝焉

一張五色石湖雲天上吹來墮小軒化作虹橋倚鍾阜
渡將老子到吳門黃鐘路鼓鳴清廟玉戚金支無大尊
乃是寄儂詩數紙却拈瓊怪向誰論

匡鼎才來頓解頤盧能自笑未經師分無楓落吳江句
博得池生春草詩木李拋將引瓊玖詩筒從此走符移
蛤蜊龜殼非難辨只問先生汗漫期

領客南園

南園多日不曾來領客閒行始此回獨樹小梅開一朵

被他攔住勸三杯

人間俗殺是公筵最苦沉烟雜燭烟何似大家行幾步
逢花即飲醉還眠

和處恭尚書清涼寺勸農

石城諸峯入天半曾隨騎吹經行遍梅花換歲初不驚
驚報行春再出城官瓶晨炊雲子玉兵厨夜壓秦淮綠
尚書親餉老農夫塞道夫須無獨速勸農文字不怪奇
知道尚書愁我飢有如山農出南溪老穉隨觀韓退之

叟攜羣穉穉扶叟一生祇識茅柴酒尚書賜酒誰得嘗
瓦盆滿引無升斗今年好風來自東五風十雨堯日同
尚書歸去作相公當寄豐年書一封

誠齋集卷三十三

謹案卷三十一第五頁後八行萱草都齊柳半句
按勻字出韻

第十一頁後七行聳肩跂一足原本肩訛扇據別
本改

第十六頁後八行收拾江山入懷袖原本拾訛入
據別本改

卷三十二第六頁前六行第三高尖原本尖訛矣
據別本改

卷三十三第九頁後六行和機失却天未知原本
失訛吞據別本改

第十二頁後六行忽到新林野竹邊按竹一本作

水

第十九頁後五行綠刺一共雙苓子按苓字疑訛





總校官庶吉士臣張能照

校對官庶吉士臣陳墉

謄錄監生臣朱烺